

# Nochemol iwwer die Riedstrooß

Vor e paar Woche hadde merr om Stommdisch iwwer die Riedstrooß geschwätzt. Dann iss die Kerb kumme unn mir hadde uns gonz schee iwwer die Buwe uffgereecht, die den Betong ins Loch ferr der Kerweboom geschitt hadde.

No ja, unn weil merr om vergangene Sunndaach gonz schnell mettem Fußballspill in Paris ferdisch warn, iss dess Thema Riedstrooß widder uff de Disch kumme.

Wissder, hott de Schorsch gesacht, es sinn halt 550 Meter wenicher ze fahrn von de Klowerstrooß zu de Kreuzung von de Umgehungsstrooß unn zum Friedhof, wennde dorsch die Riedstrooß unn nit dorsch die Edderschemer Strooß fährt.

Gut, sacht de Karl, awwer wenn uff de Riedstrooß dir ooner entgeeche kimmt, mussde warte, bis der e Lück zwische de parkende Audos gefunne hott, bevor du weiderfahrn konnsd. Unn dess kost halt Zeit unn kost aach Sprit.

Ich habb genickt. Dess Schlimme iss joo, dasses Leit gibt, die nit warte wolle. Die fahrn dann uffs Trottwar, brettern knapp on de Hausoigäng vorbei, unn dess von de Klowerstrooß mindestens bis zur Beethovestrooß. Doo kann emol schnell was bassiern. Mir hott ooner erzählt, er hott uff de Leiter vor soim Haus gestonne unn doo saust ooner uff soim Trottwar vorbei, nit alles dass der die Leiter umgefahnt hätt. Wehe doo kimmt grad e Kind außem Door – so schnell kann der Trottwarfahrer garnit bremse.

De Schorsch hott mettem Kopp gewackelt unn gefroocht: Also was det ihr mett de Riedstrooß mache, wenn ihr was ze mache hädd?

Sacht de Karl: Mir dete die Riedstrooß Richtung Friedhof ab Klowerstrooß zur Einbohnstrooß mache, bis hinne zu de Maler-Schütz-Strooß.

Ja, habb ich gesacht, unn Dreißig dete merr mache, die gonz Streck bis enaus zur Umgehungsstrooß.

De Schorsch war noch nit iwwerzeucht. Was hädden dess fern Vorteil?

De Karl druff: Doo kennde die, die de korze Weech nemme wolle, nooch wie vor dorsch die Riedstrooß fahrn unn missde nit dorsch die Edderschemer Strooß. Awwer weil kooner von vorne kimmt, bräucht aach kooner mehr iwwers Trottwar ze fahrn. Unn weil longsoomer gefahrn werrd, hätt nit nor dess Kronkehaus wenicher Krach, aach die Ooliecher dort hädde mehr Ruh.

De Schorsch war hartnäckisch. Unn wie kimmt merr vom Friedhof zurick? Det ihr de Bohnweech dann zur Einbohnstrooß rickwärts mache?

Ich habb de Kopp geschittelt. Naa, dess wär nit notwendig. Wennde erst emol uff de Umgehungsstrooß bist, aach wennde vom Friedhof her kimmst, konnsde in die Stadt fahrn wie de willst: Zum Beispiel dorsch die Edderschemer Strooß zurick in die Grawestrooß odder dorsch die Unnerführung enaus in die Kapellestrooß.

Newe om Disch hott e Pärche aus de Unnermoostrooß gesotze unn hott uns zugeheert. Als merr mett de Riedstrooß ferdisch warn, hott der Monn gesacht: Ich werr vorschlaache, dass eiern Stommdisch geadelt werrd

No wie dann sowas, hott de Karl gefroocht, mir sinn joo gut, awwer geadelt?

Der Monn hott gegrinst. Weil de Norbert Hegmonn in ooner von de letzde Stadtverordnetesitzunge gesacht hott: Die Sach mett de Riedstrooß iss de Schweiß von de Edle wert. Unn wenn ich heer, wie ihr eich doodemett beschäftigt, dann schlaach ich vor, eich ze adele: Stommdisch Die Edlen vom Herrsch.

Eiern Honnes